

卷四



惜抱軒書錄卷一

經錄

郭氏傳家易說



書名 [惜抱軒遺書三種] 惜抱軒書錄四卷
 撰者 清 姚鼐 撰
 卷四
 內容分類 史·書目·公庫箸錄·清
 索書號 大木·叢書部·53
 編號 B4063600

彩色首頁1

東洋文化研究所漢籍目錄 編號: B4063600

東洋文化研究所漢籍目錄所藏漢籍善本全文影像資料庫 索書號: 大木·叢書部·53

漢籍善本全文影像資料庫文本 [惜抱軒遺書三種] 惜抱軒書錄四卷

版權所有: 東京大學 東洋文化研究所

使用上的注意事項

郭氏傳家易說十一卷宋郭雍著雍字子和洛陽人父
 心孝受學程子嘗著兼山易解矣靖康中忠孝以提刑
 難於關西其書散逸雍遭亂後隱居峽州長楊山谷
 此書述其父志乾道中守臣薦於朝旌召不起遣官
 所欲言乃以傳家易說進雍是書雖云原本父說而
 多出於自得者朱子云兼山易溺於象數之學今觀
 書大抵剖晰義理與程子傳相似雍之言曰易之書

惜抱軒書錄卷一

文彥嗜古精繪事爲楊維禎所稱其家多藏古蹟又於志記所載見聞所及廣搜博識加以品藻輯爲是編續編一卷明韓昂所纂起明初訖正德百五十年間採輯得一百七人而冠以仁憲孝三宗御筆昂官欽天監副書成於正德十四年

惜抱軒書錄卷三

惜抱軒書錄卷四

集錄

楚辭協韻

楚辭協韻十卷首又有讀騷大旨一卷明屠峻撰其意以朱子所載協韻爲未備是以廣之然所增實未必當南人讀名如民至今猶然故離騷肇錫余以嘉名與靈均協此方音也豈必讀名爲彌延反均爲居員反乎漁父篇舉世皆濁我獨清眾人皆醉我獨醒二句爲韻是以見放無韻古人文字不拘往往若此峻必讀清爲干羊反讀放平聲以協之然則篇末遂去不復與言當入



何韻乎峻又好取說文字體改今楷法以爲楚騷文字
在小篆未變之前寫楚辭者宜用小篆分草今刊本雖
遵用隸書然宜以六書善本正其差譌夫隸體與分草
之興初不相遠且意取簡易與篆固殊昔漢時隸書俗
體紛亂蔡邕寫石經正之然邕書石經若五經文字所
傳不大異於今隸體也其後六朝及唐書家俗體益盛
顏元孫作千祿字書正之傳其從子真卿元孫之言曰
字書源流起於上古自改篆行隸漸失本真若總據說
文便下筆多礙當去泰去甚使輕重合宜其論若是若
蔡邕與元孫者所謂通人也作書者但取法蔡顏上不

肯於古下不駭於今是亦足矣若盡依說文改變形體
以爲能守六書之義轉爲煩重則但作篆可耳奚以隸
爲蔡邕顏元孫所斟酌而不取者而今獨爲之自漢以
來隸書寧有是哉若峻者所謂用意之過者也峻又名
本峻字田叔鄞人以蔭仕至福建運使在萬厯閒

陳子昂文集

陳子昂字伯玉仕武后時終右拾遺其文集十卷韓愈
詩云國朝盛文章子昂始高蹈柳宗元謂張燕公工著
述張曲江善比興兼備者子昂而已其後馬貴與謂子
昂惟詩語高妙耳韓柳並稱其他文何哉蓋以其小變



齊梁之陋韓柳論本朝人文或稍假借之亦其宜也子昂上書武后請興明堂太學宋祁嗤之謂薦圭璧於房闈文苑英華別有大崇福觀記記所云太祖孝明皇帝者武士護也集無此篇今增入之當時文士之諂於武氏而不之恥者風俗使然蓋無足怪也

張說之集

唐張說字道濟一字說之爲玄宗左丞相中書令封燕國公唐藝文志文獻通考並云獻公集三十卷今止二十五卷采於他書復得其文六十餘篇又原集編次其類紊亂今重定之而增其漏脫仍爲三十卷說爲文得



失具於唐書其文與蘇頲並稱燕許其才洵有出乎當時者本傳不載從武懿宗軍事以集考之蓋嘗同行盧藏用於陳子昂傳云契丹殿畔臺閣英妙皆署軍麾者是其事也說之爲武懿宗上功狀佞諛已甚及玄宗時誌高力士父母之墓稱之不容口而銘上官昭容曰如彼九日羿焉暴之說乃以睿宗誅婉兒爲非邪辭之無體亦甚矣

顏魯公集

唐太子太師魯國公顏真卿唐書藝文志載其集云吳興集十卷又廬陵集十卷臨川集十卷然此書北宋時

已佚劉敞作真卿集序第三云吳興沈侯採掇遺編輯爲十五卷而已嘉祐中又有宋敏求編本亦十五卷江氏筆錄云敏求編本詩至一百十八首其博如此南宋嘉定時永嘉守留元剛得敏求本失其三卷乃以所見真卿文別爲補遺並爲撰年譜然元剛雖爲補遺缺漏猶甚而宋沈所編全書皆亡後人乃分留元剛之十二卷爲十五卷以當之卽今所傳本也今以世所有真卿石刻傳文旁加採探較留本僅多得十餘篇蓋金石毀泐去唐益遠求復宋敏求所編之舊不可得矣按真卿忠義氣節唐一代偉人其文字固可寶貴史稱真卿博學

工辭章今觀其遺文雖散佚僅存史言猶信又按唐高祖之祖虎佐周始封於唐追尊爲太祖景皇帝其上懿祖又其上獻祖唐自德宗以前議太祖禘祫之位久不定建中二年真卿爲禮儀使上廟享議曰太祖景皇帝居百代不遷之尊而禘祫之時暫居昭穆屈已以奉祖宗可也當時用其言禘祫時以獻祖居東向而懿祖太祖爲昭穆矣及貞元時議者乃謂非是下羣臣議改太云禘祫之時獻祖居東向景皇帝宜從昭穆之列祖以孫尊孫以祖屈求之神道豈遠人情後朱子推愈此議

禮學精深得孝子慈孫報本反始不忘所自生之本意
按愈之說與真卿正同是則真卿非僅忠義大節見於
一時者之可尊而其爲文亦非第博學工於辭說者之
爲貴蓋議禮精審上當先王之心而下足爲後世大儒
之所敬歎則又如此然愈之議竟不見用於貞元之末
而真卿之說乃得行於建中之初蓋真卿是時名稱位
望爲朝廷所信固重於愈之在貞元閒及乎真卿去國
而當世遂不肯終守其說移易是非迄於終唐之世爲
可惜也今集第一卷已載廟享議畱元剛又取唐文粹
所刪削者載於補遺題曰禘祫議固已重複篇末乃有

時議者舉然云云此乃新唐書陳京傳敘事之辭非真
卿本文益明又顏元孫作干祿字書并序真卿書之刻
石元剛乃亦以爲真卿文入之補遺皆非是故刪去此
二篇而增今所搜輯者皆別記所出畱本舛誤尤多復
爲隨文辨正計原集十五卷補遺一卷年譜一卷行狀
碑文一卷新舊唐書傳一卷合十九卷首有劉敞序末
有畱元剛後序元剛字茂潛丞相畱正之子終起居舍
人

獨孤及毘陵集

獨孤及字至之仕唐代宗時終常州刺史有毘陵集三





十卷唐自貞觀以來文士沿六朝之體開元後稍稍厭之而未能盡返於樸及興於永泰大歷之間爲文尤能遠藻麗之習其後韓愈以振古之才繼之唐文遂軼東漢而復乎西京然推其初斲雕爲樸及蓋與有功焉及所爲景皇帝配天議及郭知運呂諲諡議人頗推以爲允集有馬退山茅亭記又載柳宗元集何焯以記云歲在辛卯斷其非及文非也及沒於大歷十二年年五十三上推之至天寶十年辛卯及已二十六歲矣文苑英華有代獨孤將軍讓魏州代崔使君讓潤州及賀赦等表今集所無賀赦表云誅翦大憝清復闕廷接踵之禍

又起近郊歸過罪已降去鴻名此似言德宗興元時事及所不逮見也疑文苑英華誤謂及文耳

追昔遊集

追昔遊集三卷唐李紳著紳字公垂武宗時爲中書侍郎同中書門下平章事而此集則皆文宗開成以前紳未爲相時所作意會昌中編錄故名曰追昔遊新唐書本傳所載貶端州司馬禱神灘漲及判壽州虎不爲暴爲河南尹惡少斂跡皆語出此集紳凡莅官之處多自夸詡史傳事須實錄而以所自言者爲據此蓋宋祁之陋紳之赴端州也在夏秋之間其妻子舟行十月始至

其時灘水減矣故以書祝媪龍祠而江復漲紳詩內及所自注者如此祁乃以爲紳自度嶺時事是閱其集亦未審也

司空表聖文集

唐司空圖字表聖僖宗時知制誥爲中書舍人旋解職去僖昭之間屢命以官皆辭卒拒朱全忠之召唐亡不食而死唐書列之卓行傳文集十卷舊總題爲雜著不分類今依其舊次內有奉敕撰華帥德政碑華帥者韓建也碑作於乾寧元年稱建爲潁川郡王其後乾寧三年昭宗始幸華州五代史謂昭宗幸華爲建立德政碑



還朝封建潁川郡王以碑證之皆非是當是時建強橫又偏近京師天子不得已而譽之圖所作文尚多誠飭之辭不甚誇美足見剛毅之氣存焉宋祁云王重榮父子雅重圖嘗爲作碑集內解縣新城碑爲重榮作河中生祠碑爲其弟重盈作然其辭皆奉敕爲之也圖晚年號耐辱居士陳繼儒太平清話載耐辱居士墨竹筆銘此集所無其銘序云咸通二年登進士叨職史館按唐荆初成進士未有卽入史館者圖成進士在咸通末出依王凝爲幕職本傳所載甚明焉有職史館之事序又云自後召拜禮部員外郎遷知制誥尋以中書舍人

拜禮戶二侍無日不與竹對按序稱墨竹種於長安圖
之拜禮部員外郎也固在長安矣若知制誥中書舍人
乃僖宗次鳳翔時所拜官其爲兵部侍郎又當昭宗在
華州時何由與竹對乎圖身爲唐死年七十二而序乃
云今爲梁庚寅余年八十有二其爲妄人僞撰益明特
繼儒又妄信之耳茲故不復採錄圖最工詩其詩有一
鳴集別行亦不入於此編

李旰江集

李觀字泰伯建昌南城人載宋史儒林傳集內年譜一
卷詩文三十七卷話辭及他人爲作詩文三卷合四十



一卷朱子謂泰伯文實有得於經能自大處起論陳振
孫云泰伯不喜孟子作常語專辨之今按觀常語內惟
論仲尼之徒無道桓文之事及伊尹廢太甲周公封魯
此三者與孟子不合耳其餘文中引用孟子之處甚多
答李觀書云孟子荀楊醜疵之說不可復輕重是觀未
嘗不喜孟子然朱子讀尊孟辨引觀有孟子五霸之罪
人語今集內無之然則陳振孫所見之常語蓋多於今
本不知今本爲人刪削邪抑宋世所行或反有非其真
者邪觀之文章蓋次於歐曾蘇王其論治體頗可見於
實用茲尤可貴也其平土書明堂五宗皆別有圖圖今

不傳惟其序說存於此

嘉祐新集

蘇洵字明允嘉祐中以文安主簿爲禮院編纂蓋宋初以主簿爲選人初堦洵生平固未嘗一至文安也歐陽修張安道並云洵集二十卷今嘉祐新集十六卷意後人編次更其卷數非闕佚也未別載歐陽修等爲洵作文一卷合十七卷洵立論偏駁儒者皆不取其學問所及采覽書籍亦非廣博獨文章雄健闕偉後之文士莫不推服爲不可及然今求於其集爲文乃不過百篇然則世之爲文苟欲多而實無取者皆洵之所鄙也與

陳無已文集

陳師道字履常一字無已終祕書正字載宋史文苑傳政和中其門人魏衍編次其詩文集爲二十卷今本益以談叢詩話共爲二十一卷師道與秦觀書云僕於詩初無師法及一見黃豫章盡焚其藁而學焉答晁深之書云僕以文見曾南豐辱賜以教又作詩云向來一瓣香敬爲曾南豐蓋其詩文各有從出如此至其操行清介處貴賤險夷之間終始不易其節以蘇軾薦得官然蘇門四學士如晁秦之流行誼皆莫能及之集首有魏衍記衍字昌世彭城人又有王雲題辭雲字子飛澤州

人副康王使金割三鎮被殺於磁州者也

任淵注陳無已詩

陳師道詩六卷任淵所注釐分爲十二卷前有年譜一卷其十三卷師道人品既高潔其詩亦深厚沈淡不以聲色爲工是以朱子最喜之謂其有勝黃庭堅處然以其託意極深未易驟識獨任淵所爲注能盡發其幽深之思茲其爲可貴也淵字子淵新津人紹興乙丑類試第一人仕至潼川提刑新津有天社山故稱天社任淵淵嘗注黃庭堅詩亦爲世所重而注師道集爲尤勝云

鴻慶集

孫覲字仲益晉陵人宋徽宗末蔡攸薦爲侍御史靖康初蔡氏已敗乃率御史極劾之當金人初圍汴時李綱罷御營使太學生伏闕爭之復職覲後劾李綱要君又言諸生將再伏闕朝廷以其言不實斥守和州旣而李綱去國復召覲爲御史專附和議進至翰林學士金人破汴都覲受金人女樂乃爲欽宗草表上金主極其筆力以媚金張邦昌爲帝覲又事邦昌建炎初貶陝州再謫嶺外黃潛善汪伯彥復引之使掌誥命爲馬伸所劾其後又以贓罪斥提舉鴻慶宮故其文稱鴻慶集孝宗時洪邁修國史謂靖康時人獨覲在請詔下覲使書所



見聞靖康時事上之觀於是於所不快諸正人如李綱輩率加誣辭邁遽信之載於欽宗實錄其後朱子與人言及以爲恨謂小人不可使執筆蓋誠然也觀宋史無傳其事散見於他書者如此故陳振孫以爲觀生於元豐辛酉卒於乾道己丑年八十九可謂耆宿矣而其生平出處則至不足道也然其詩文頗工尤長於四六與汪藻洪邁周必大稱南宋四家集凡七十卷明嘉靖時其鄉人將刻之徐問持之曰觀得罪名教安得以文集流傳遂止觀所草欽宗上金表集中無之惟靖康繫年要錄載其辭云二里之城已失藩籬之守七世之廟幾爲煨燼之餘久煩汗馬之勞用效牽羊之請然亦失其全文蓋其辭甚醜宋人羞書之矣

廖高峯集

廖剛字用中南劔州順昌人宋紹興中爲御史中丞出提舉明道宮致仕高峯其號也朱子語類論龜山門人有云廖剛助和議幸不爲檜鷹犬耳今觀其集若漳州被召上殿乞約束邊將諸劄皆以和爲善朱子之言誠然宋史本傳載金人畔盟剛乃有責鄭億年以百口保金人之語又欲起舊相有德望者以是爲檜所惡致斥奉祠本集又載與秦相公書論和之失則亦金人背盟



後事也蓋剛本心尚不失爲慕義特以其無堅定之識
易爲隨俗附和之辭故前後若出兩人宋史乃以剛與
張九成胡銓力排和議者同傳失其倫矣剛奏議中指
陳當時事勢利弊頗多可採答陳幾叟書論知制誥之
失尤爲切當而宋史獨載其乞設親軍劄子及止高宗
節序遙拜欽宗之事夫天子撫綏億兆駕馭英傑顧區
區以募軍自將爲計乎剛徒有鑑於建炎苗劉之變而
不知其言之陋也高宗於欽宗嘗北面爲臣矣乃第以
爲兄而不用君臣之禮茲殆謬論傷理者哉世傳高峯
集十二卷皆鈔本脫字或數行又多舛誤無從校補今

悉依錄之

呂東萊先生集

呂本中字居仁當宋紹興中以排和議忤秦檜見斥於
朝其仕至中書舍人故宋人稱爲呂紫薇又稱爲東萊
先生而呂祖謙亦稱東萊先生蓋呂好問嘗封東萊郡
侯本中其子也祖謙其曾孫也故並襲其稱集凡二十
卷有陸游序曾幾後序及宋史本傳附焉本中詩法出
於黃庭堅嘗作江西宗派圖推庭堅爲始師朱子云呂
紫薇論詩欲字字響其暮年詩多啞然尊江西派者終
推呂東萊爲幟文獻通考又載本中集外詩二卷今無



之又陸游序云嗣孫祖平盡哀公他文爲若干卷今此集惟有詩他文悉泯不傳矣獨其草趙鼎遷僕射制所云合晉楚之成不若尊王而賤伯散牛李之黨莫若明是而去非此語賴秦檜惡之載於日歷以爲本中罪反令傳誦至今文字傳否其難料如此士故以卓然自立有可稱述爲貴若夫文章派別爲世所或軒或輊者抑皆其末也

鄧峯漫錄

鄧峯漫錄宋丞相史浩集也浩字直翁鄞縣人紹興中進士孝宗在王府浩爲教授孝宗卽位進至右僕射爲

王十朋劾罷奉祠淳熙中再入爲右丞相尋又去爲保寧軍節度使旣而致仕封魏國公卒諡文定浩之歸也自號鄧峯真隱故編其集爲鄧峯真隱漫錄內詩五卷文三十九卷詞曲四卷童卯須知二卷其五十卷當高宗內禪南渡士大夫忠憤之氣久鬱於和議而欲一伸於孝宗之初是故以張浚之屢敗喪師經理失策猶爲忠義之士之所許以浩獨與異議遲顧慮患雖所言後亦頗驗而世猶以其沮北伐之爲懦也其後張浚旣沒浩跋揚廷秀張魏公配享議後不以爲天下之公議第稱揚感張吹噓獎進之恩能以國士報之蓋浩於浚猶



有餘忿存焉朱子謂浩喜薦人才極不易得今觀集內若薦石塾薛叔似等劄子蓋誠能薦賢者浩又有回奏御製厚道辨及策士聖訓皆載孝宗詔論於前而綴已所論於後夫浩謂恐其君過語傳於天下是以致辨欲掩其失今反載之已集以傳是揚君過而已爲名也况孝宗以所云國朝以來過於忠厚此於事頗得實未爲失浩之斤斤致辨徒爲將相誤國失事者地爾是其謬於理而強於辭亦甚已浩操行非純集內持論得失相雜取其於史事多有所關足備攷證至其文字工拙蓋亦不足論云

義豐集

義豐集一卷宋王阮著阮字南卿德安人王韶之曾孫隆興元年進士仕至撫州守召入奏韓侂胄欲見之卒不往怒使奉祠歸廬山以終阮少謁朱子於考亭朱子知南康時阮又從遊故集中有唱酬之作阮之歸也朱子惜之謂其才氣術略過人而流落不偶云集首有淳祐癸卯吳愈序謂其文無一字無來處論邊事則鼂賈其倫爲記銘則韓柳其亞今所存僅詩一卷而已岳珂云阮學詩於張紫薇紫薇者張孝祥也

北溪集



宋陳淳字安卿漳州龍溪人載宋史道學傳朱子守漳
州時淳受業門下朱子嘗言吾南來得一安卿爲喜其
後再見朱子於考亭時朱子已寢疾相從一年辭歸朱
子亦旋沒矣淳能謹守朱子遺訓其文篤實有得之言
也然其規模則已隘矣集凡五十卷

方秋崖集

方岳字巨川號秋崖歙人宋紹定五年進士淳祐中爲
趙葵參議官移知南康軍以杖荆湖州卒忤荆帥賈似
道後知袁州又忤丁大全被劾罷事詳洪焘祖所爲秋
崖先生傳其集傳本有秋崖新稿三十一卷係影鈔宋



寶祐五年所刻又秋崖小稿文四十五卷詩三十八卷
係明嘉靖中所鈔今以兩本校之嘉靖本所載固多於
寶祐本然亦有寶祐本所有而嘉靖本所無者詩文各
數十首今統編入歸爲一集定爲八十三卷仍前載洪
焘祖所爲傳焘祖謂其詩文四六不用古律以意爲之
語或天出此言頗能兼盡其得失岳在淮南與趙端明
書舉葵馭軍之失辭甚切直可謂幕僚之忠告者及與
廟堂書併代葵作書欲解葵兄趙范撫襄之失累牘不
休范爲帥失律喪南宋百三十年堅守之襄陽非小罪
也岳以居葵幕府乃欲爲范遊說於是乎有曲辭矣

陵陽集

牟巖字巖之父子才宋端明殿學士禮部尚書理宗時稱爲剛直宋史有傳巖仕至大理少卿入元不仕閉戶三十六年著陵陽集三十四卷其九日五言詩序論陶潛於王宏中路具酒食事及題淵明圖諸文意皆自寓巖嘗論世喜稱淵明入宋書甲子無年號黃豫章亦曰甲子不數義熙前然今陶集詩本無書年號者惟祭妹文稱義熙三年此宋號也淵明恥事裕大節較然此未須深論故巖文中閒有用至元年號者意本此也子才本蜀之井研人後以蜀亂不能歸淳祐中居於湖州故

巖從爲湖州人因多與趙孟頫錢選周密唱和然其集猶名陵陽者尊本思舊之意也井研仁壽二縣閒有隆山隋以此置隆州唐避諱改陵州山亦名陵山陵陽之名蓋取諸此巖別著六經音考元時最有名今不傳巖子應龍元史亦有傳蓋以文學世其家者

金玉若虛文集

金玉若虛文集四十五卷詩文皆平其論文詆史記歐陽公古文語句古拙若虛以其區區之見乃欲強而從已甚覺可笑其於詩指摘山谷不遺餘力而甚推白樂天不謂之蚍蜉撼大樹不可得也經說則好與朱子異

惜抱軒書錄卷四
凡所言者多矣豈無一言之善而不勝其迂謬猥陋者之多也

王惲秋澗集

王惲字仲謀元世祖時官翰林學士事詳元史本傳其文自謂學於元好問傳稱惲有材幹此集不獨文章亦頗詳吏事內詩文七十七卷承華事略二卷中堂事紀三卷烏臺筆補十卷玉堂嘉話八卷其一百卷承華事略進於裕宗在東宮時裕宗甚喜其書令諸皇孫傳觀焉其玉堂嘉話中論遼金不當爲載記之說尤爲平允當時所取以作遼金史者也

剡源集

剡源集元戴表元著表元字帥初一字曾伯慶元奉化人宋咸淳進士教授建康府旋歸改教授臨安府不赴元大德中起家爲信州教授秩滿歸卒於家元史本傳稱其文清深雅潔至元大德閒東南文章大家惟表元一人蓋宋末詩文體益陋表元尚能以雅正自持其後宋濂尤愛之故作史時推崇如此然亦過矣今剡源集三十二卷內文二十二卷詩十卷後附拙逸稿一卷按表元小方門戴氏居葬記云表元之祖諱汝明生五子長諱深自號拙逸居士表元由居士第三子爲仲文後



然則此卷皆滌詩也又一卷自阿東墓碑銘以下至考試對策則皆表元之文未入集者又一卷題曰雜鈔蓋表元偶所筆記者末一卷則袁桷爲表元墓誌及凡爲作哀辭傳序者皆在焉是爲集外四卷合前集爲三十六卷

麗則遺音

麗則遺音四卷元楊維禎所賦也元仁宗皇慶二年定科場考試程式漢人南人第一場經義第二場古賦詔誥維禎成進士在泰定帝四年定制十四年矣故所擬場屋之文皆古賦而坊閒刻行以爲式法者後附順帝

至元元年湖廣鄉試荆山璞賦四篇

王禮文集

王禮字子讓廬陵人元末在全普菴撒里幕府後遷廣東元帥府照磨明興不仕聘爲考官亦不就前後集各十二卷其二十四卷首有劉定之序謂其託耕鑿以棲跡於運去物改之餘依麩粳以逃名於頭童齒豁之際其文奇氣肆矧猶若佐全普菴時以未裸將周京故也有與子讓同出元科目佐石抹幕府其氣亦有掣碧海弋蒼昊之奇及攀附龍鳳有作嘒暗鬱伊捫舌駢顏曩昔氣漸泯無餘矣定之是言蓋以譏劉基也其辭雖太



過然禮之所自處則誠高矣

舒頔文集

舒頔字道原績溪人元末爲台州學正明興不出著貞素齋集八卷後附俞希魯唐仲實等一卷又附其弟舒遠詩一卷首有頔自序及自傳傳云富貴非吾願靖節翁與吾異世同志者然頔文中往往稱頌明之功德蓋遜言也詩文皆有可觀舊本編次雜亂今稍更定之凡十卷

解學士集

解縉字大紳亦字縉紳吉水人洪武二十一年進士永



樂閒爲翰林學士直文淵閣與機務以高煦譖出爲布政司參議後逮死獄中縉於明初文章才氣最爲奇偉被禍時家族徙遼東所爲文多散逸而其名聲最著民間俚辭小說率附於解學士流傳詩文亦多僞作天順中黃諫始輯其集爲三十卷嘉靖中其從孫桐再輯之爲十卷卽今本也縉所上太祖太廟西室封事議論精卓其文頗宏傑史家爲縉傳所載多刪節獨集中爲全文集又載上太平十策一篇今觀其文旣與太廟封事全不類而如所云天下官路皆分五級築牆爲隔之類爲策尤迂謬可笑竊疑爲庸俗學究所爲託於縉者非

真縉所上也楊士奇銘縉墓不言所上策其後周廣作墓表始言之蓋在天順黃諫編集其文之後廣誤信載之耳羅洪先序其集云稍剔其僞蓋洪先固知其多僞作矣此十策者所剔之未盡者也相傳既久不敢決去仍依舊本鈔錄而爲論辨之首載黃諫羅洪先兩序末附行狀墓碣諸文凡三十卷

綸扉奏草

葉向高字進卿福清人明神宗時爲相八年告歸熹宗時再起又相四年所爲綸扉奏草三十卷神宗時所爲疏揭也續稿十四卷熹宗時所爲也合四十四卷皆有



向高自序向高所事皆闇主其言雖正疏揭雖多然爲神宗熹宗所寓目者殆無幾見而允行者尤少軫又言楊漣劾魏忠賢向高頗不然之因其門生繆昌期諫正乃具揭請帝允忠賢辭去及爲忠賢所愠則又歸過於昌期以自解是以其疏揭之辭大抵出於牽畏公議愛護名聲者爲多較之忠直出於至性者誠有閒矣方退歸之日遽取平生奏議序而刻行之何其急欲自明也然當時國事猶賴其少有維持天下正人終以爲倚賴而羣小遂亦目爲黨魁其後向高去而清流之禍愈亟是可悲也向高又有綸扉尺牘十卷其有關當日時事

者已於奏議見之故不復錄云

商文毅公疏稿略

商文毅公疏稿略一卷明商輅所撰輅字宏載淳安人正統十年殿試第一除修撰越四年入閣辦事成化中進至謹身殿大學士太子少保吏部尚書告歸卒諡文毅輅生平大節具詳明史本傳此疏稿多關政事得失辭意切直此憲孝開所以爲明之盛時也卷後有其孫汝頤識云先大父素菴文集凡數十卷兩遭回祿悉爲煨燼幸此卷獨存然則輅之忠言讜論或不止此而今所逸而僅存者爲尤可重也

西巡類稿

西巡類稿八卷吳廷舉所著廷舉字獻臣梧州人成化末進士正德初爲廣東布政副使巡歷省治以西諸郡時所奏疏及往來文牘詩詞之類皆在焉故曰西巡類稿史言其發中官潘忠罪爲忠反許下詔獄劉瑾矯詔枷之幾死及觀此編廷舉上十疏內有參岷王府內監陳鶴稱令旨差往廣東違法乘驛騷擾又奏各省鹽務差內監查盤者因斂銀內進又有人事銀以賄各衙門賀禮銀以賄司禮監此三者並科擾百姓請敕御史體察而盤查廣東鹽庫之內監韋霽將鹽課盡解京令廣



東無以充軍餉其事不可行凡廷舉所奏若此而已無
發潘忠罪事編首有劉瑞序云逆瑾切齒於君其黨探
望風旨誣奏卽械下錦衣衛獄枷吏部門左垂死而後
釋之瑞廷舉同時人言尤必得實然則今史傳誤也廷
舉後復起嘉靖中右都御史巡撫南畿勒致仕死隆慶
中追諡清惠

江湖集

江湖小集六十二家洪邁野處類稿二卷僧紹嵩江浙
紀行集句詩七卷葉紹翁靖逸小集一卷嚴粲華谷集
一卷毛珣吾竹小稿一卷鄧林皇華曲一卷胡仲參竹



莊小稿一卷陳鑒之東齋小集一卷徐集孫竹所吟稿
一卷陳允平西麓詩稿一卷張至龍雪林刪餘一卷杜
旃癖齋小集一卷李龔梅花衲三卷翦綃集二卷施樞
倦遊稿二卷橫舟稿一卷何應龍橘潭詩稿一卷皆絕
句頗佳沈說庸齋小集一卷王同祖學詩初稿一卷陳
起芸居乙稿一卷吳仲孚菊潭詩集一卷劉翼心遊摘
稿一卷朱繼芳靜佳龍尋稿二卷林尚仁瑞隱吟稿一
卷陳必復山居存稿一卷斯植采芝集二卷劉過龍洲
道人集一卷葉茵順適堂吟稿五卷高似孫疏寮小集
一卷敖陶孫臞翁集二卷附詩評朱南杰學吟一卷余

情抱車言錄卷四
觀復北窗詩稿一卷王惛穉林小稿一卷劉仙倫招山
小集一卷黃文雷看雲小集一卷姚鏞雪蓬稿一卷俞
桂漁溪詩稿三卷薛嶠雲泉詩一卷姜夔白石道人詩
集一卷周文璞萬泉詩集三卷危稹巽齋集一卷羅與
之雪坡小稿二卷趙希樞抱拙小稿一卷黃大受露香
拾稿一卷吳汝戈雲臥詩集一卷趙崇錡鷗渚微吟一
卷葛天民小集一卷張弋秋江煙草一卷鄒登龍梅屋
吟一卷吳淵退菴遺集二卷宋伯仁雪巖吟草一卷薛
師石瓜廬詩一卷附諸跋題及墓誌高九萬菊礪小集
一卷許斐梅崖詩稿一卷融春小綴一卷有雜文梅屋

第三稿一卷第四稿一卷戴復古石屏續集四卷利登
陂稿一卷李濤蒙泉詩一卷樂雷發雪磯叢稿四卷張
蘊斗野稿支卷一卷劉翰小山集一卷張良臣雪窗集
一卷葛起耕檜庭吟一卷武衍適安藏拙餘稿二卷林
同孝詩一卷共九十五卷內惟姚鏞周文璞吳淵許斐
有賦及雜文餘皆詩也宋自光寧以後士風衰陋江湖
遊士每以詩干謁貴人以求贈遺什伯爲羣臨安書賈
陳起字宗之能詩頗與文士爲友遂收其詩並已詩刻
之爲江湖集寶慶初史彌遠廢立之際起有詩云秋雨
梧桐皇子府春風楊柳相公橋彌遠聞之怒捕起黥配



之而敖陶孫劉克莊等皆以詩語譏刺下獄時鄭清之爲學士白彌遠解止之得免罪然遂下詔禁作詩毀江湖集板彌遠死詩禁乃解此六十二家相傳卽起所集然彌遠死於紹定六年而今傳此集多載端平淳祐寶祐紀年反在其後豈彌遠死後起遇赦回乃復刻詩邪又如洪邁孝宗時人而吳淵樂雷發等貴人宜與江湖諸士不相類疑此等或出於後人增益非起江湖集所本有也其中詩優者亦不過數家而劣者至不免俚俗蓋所謂江湖干謁之士大抵其習陋而才亦薄矣又按戴表元題孫過庭書譜後云往時杭州陳道人家印書

書之疑處率以己意改令諸順殆是書之一厄然則起亦尋常書賈少知文藝耳世或過推之亦非也

十先生奧論

十先生奧論者合程子張耒楊時朱子張栻呂祖謙楊萬里胡寅方恬陳傅良葉適劉穆元戴溪張震陳武鄭澁諸人所論分類編之前集後集續集各十五卷續集脫去前五卷僅存十卷三集共四十卷不知誰編脫去卷內不知誰論存者已十六人而名十先生亦不可解其中閒有注語似南宋時人編爲場屋作論法也內十人宋史有傳其餘張震字東父益寧人孝宗時中書



舍人龍夫淵曾觀除知閣門事繳回詞頭事見胡沂傳
鄭湜有二一字溥之三山人孝宗崩時爲從臣奏立太
子監國見畱正傳一則紹熙元年爲從政郎進治術十
卷見書錄解題今之鄭湜未審爲誰方恬字元養一字
仲退歙人試禮部第一以周必大等薦授太平州教官
除太學博士著正論十篇見徽州府志劉穆元陳武無
攷宋之巨儒偉人文集流布者固無論若其名漏於史
氏文章湮滅獨爲此集所載若方恬等議論頗卓然可
貴卽論不必當而文勢縱橫得蘇氏之遺亦可喜也此
集雖編者本不出於科舉之學而諸人之文得存於遺

軼之餘蓋亦有賴焉固網羅放失者所不廢也

羣公四六續集

羣公四六續集自甲至癸十卷皆南宋人通候之啓不
知誰編意必尚有正集而今不見矣宋人此等四六皆
效法歐蘇然其工者不過三數人餘皆平淺又其間人
品素能自立者如玉卞朋之類雖稱譽人尚措辭斟酌
有體其人品猥下者往往不擇所與極口贊揚閱之使
人憎惡如此集中方雲翼葛謙白等賀秦太師啓皆是
也選此者不甚有識又南宋初年如汪藻等四六最有
名者皆不在想已入正集耳

皇明百家詩

皇明百家詩三百卷明俞憲選憲字汝成無錫人嘉靖壬辰進士嘗以大名兵備副使移擢湖廣按察使李攀龍贈詩所謂江漢日高天子氣樓臺秋敞大王風當時譏爲陳友諒僭位聯語者也此選略於明初詳於同時憲二子淵沂詩皆在百家之列蓋鑒別之識疏而標榜之意周矣其中雜入賦及詞所錄亦非專於詩也

皇明兩朝疏鈔

皇明兩朝疏鈔十二卷蓋世穆兩朝人所進疏大名府推官吳興顧爾行所編自武宗以前有張瀚明疏議輯

略是編蓋繼之而作明至世宗時驕諂甚而君臣之志

不通公論廢而小人之黨日進當時陳疏者或忿爭詬

戾而氣不平或支蔓流冗而言失要國政自是日衰士

大夫淳厚忠樸之風自是日壞故明之敝始於世宗然

其閒猶有忠義出於至誠慷慨議論蹈禍患而不恤者

名相繼於史冊則以憲孝之澤存而正人君子之所以

自立之道累世相傳而未盡墜也是編於大禮郊祀諸

疏皆不載所收頗爲漏略至其中卓然有名諸偉議史

家大抵收入本傳其餘遺存此編者亦鮮足裒錄矣





旧挹軒書錄卷四終

州打車書錄卷四

三

所
圖
書

